

II.A- ORGANIZACIÓN DE CONGRESOS

1.- OBXECTIVOS

Esta acción ten como obxectivo estimular a organización de congresos científicos sobre problemas especializados concretos, que permitan o intercambio de coñecementos entre especialistas, españois ou estranxeiros, sempre que se cumpra o requisito imprescindible de que se presenten e defendan traballos científicos orixinais que deberán ser publicados nun libro de actas.

Quen sexa solicitante das subvencións comprométese a solicitar as axudas análogas da Xunta de Galicia e Ministerios de Educación e de Economía, Industria e Competitividade, en caso de existir convocatoria en calquera momento do ano 2017, e de cumprir os requisitos. De serlle concedida algunha destas axudas, se a suma das axudas concedidas e os ingresos por cotas de inscrición, se procede, supera o custo total da actividade, procederíase á rescisión total ou parcial da subvención da Universidade de Vigo.

2.- APLICACIÓN ORZAMENTARIA

Estas axudas financiaranse con cargo á aplicación orzamentaria 00VI 131H 641.05 Reunións científicas.

3.- SOLICITANTES

Poderán solicitar estas axudas os grupos de investigación e os centros de investigación da Universidade de Vigo, a través do seus coordinadores/as e directores/as. Só se poderá solicitar unha axuda por grupo de investigación ou Centro de Investigación, e por cada congreso. Aos efectos desta convocatoria non se considerará a organización de cursos ou ciclos de conferencias.

Os congresos deberán efectuarse durante o ano 2017 ou 2018.

4.- FORMALIZACIÓN DE SOLICITUDES E PRAZO DE PRESENTACIÓN

As solicitudes en modelo normalizado II.A dirixiranse ao sr. reitor da Universidade de Vigo, podendo presentarse ata o **28 de abril de 2017**.

Achegarase adicionalmente a seguinte documentación:

- Memoria científica xustificativa do congreso.
- Orzamento de gastos e ingresos
- Relación de membros do Comité Organizador e/ou Comité Científico se é o caso.
- Programa provisional no que conste a relación prevista de conferenciantes que se convidan e as actividades a realizar.

- Indicar, se é o caso, os ingresos por cotas de inscrición, e outros ingresos.

5.- AVALIACIÓN E SELECCIÓN

A Comisión de Investigación, delegada do Consello de Goberno, arbitrará os mecanismos e medios para proceder á avaliación e selección das solicitudes.

Darase prioridades ás solicitudes de Centros de investigación. Priorizarase a organización de congresos internacionais (tendo en conta a composición do comité científico e/ou organizador), nos que participen polo menos 3 países, que sexan avalados por organizacións de prestixio, nos que o coordinador ou coordinadora sexa un profesor ou profesora da Universidade de Vigo.

Priorizaranse as solicitudes dos grupos que non tiveran estas axudas na convocatoria anterior, e as dos grupos que non teñan viventes axudas estruturais a grupos da Universidade de Vigo ou da Xunta de Galicia. Así mesmo, priorizarase que os congresos se celebren nas provincias de Ourense e Pontevedra, e valorarase positivamente a continuidade dos mesmos.

No caso das solicitudes de grupos de investigación, poderanse considerar os méritos dos mesmos, segundo o indicado no Anexo I.

Así mesmo, en cumprimento do Plan de Igualdade da Universidade de Vigo, poderase utilizar como criterio de priorización ou desempate a paridade de xénero na composición dos grupos de investigación solicitantes, así como que o/a investigador/a coordinador/a do grupo pertenza ao xénero minoritario nesta categoría dentro do ámbito de coñecemento correspondente. A aplicación deste criterio, se procede, realizarase segundo informe emitido pola Unidade de Igualdade da Universidade de Vigo.

Intentarase seleccionar solicitudes de grupos de investigación distintos, e de grupos de ámbitos de coñecemento diferentes, en caso de existir solicitudes axeitadas que superen uns mínimos de calidade ó xuízo da Comisión de Investigación, co fin de incentivar os mellores grupos dentro de cada ámbito.

6.- NATUREZA E CONTÍA DAS SUBVENCIONS

As axudas consistirán nunha subvención que en ningún caso superará a cantidade de 3.000 € As axudas libraranse no ano 2017, e non se autorizará a incorporación de remanentes ao exercicio 2018. No caso de congresos que se realicen en 2018, poderase solicitar que a subvención se libre no primeiro trimestre do ano 2018; esta solicitude deberá presentarse de modo explícito para a súa consideración e aprobación pola Comisión de Investigación.

7.- OBRIGAS DAS PERSOAS BENEFICIARIAS

A persoa responsable da organización fará constar en toda a información e documentación do congreso (folletos, libros de actas, etc.) a colaboración prestada pola Universidade de Vigo.

Dentro do mes seguinte ao remate do encontro deberá entregarse na Vicerreitoría de Investigación e Transferencia un informe final, incluíndo documentación xustificativa da realización efectiva da actividade na que conste a referencia á axuda recibida, e unha memoria de ingresos e gastos realizados.

O non cumprimento destes requisitos comportará a automática rescisión da axuda, para os efectos do reintegro da subvención concedida.